

StAD, Urk. 560 vom 2.2.1562

Transkription:

Wir dise nach benente, Mit namen Hannibal Herr von Zinzendorff, Erbjägermaister In Österreich, Hainrich von werdenstain zu Werdenstain und Hans Stockhornner, alle drey als vollmechtige gewalthaber .N. der Wolgeborenen, Gestrenngen, Edlen unnd Vesten, Weylundt Hannsen Herrn von Zinzendorff p. seligen Nachgelassner Kinder Gerhaben in Österreych, Unnd mit Inen Ich Hanns Ulrich von Schlandersperg für mich selbst. – Bekhennen hiemit öffentlich und Thuen khundt allermeniglich für unns selbst, Unnsere Erben auch alle Nachkhomen unnd Inhaber, Weylundt des Edlen und Vesten Hannsen von Emps zu der Hohen Emps, Unnsers des von Zinzendorffs und Schlanderspergs müerterlichen Anherrn seligen, Aigenthumblich verlassnen güettern zu Torenpeuren. – Alsdann Jez gedachts unnsers Lieben Anherrn seligen Altvorderen etliche unablösige Zinslein verschafft und gewidmet haben, zu Sannt Sebastians Cappell gelegen Im Oberdorff zu Torenpeuren, Welche In so Langwiriger Zeyt durch manigfältiges thailen seer Vest zerfallen, das zu besorgen gewesst, sy möchten hinzu khünfftig Zeyt zum thail gemindert, und verloren worden, das Wir demnach mit freyem Willen, Auch mit Zeytigem Rath unnsere Nachstgesipten, dises Lanndts die gemelten Zinslin Abzulösen unnd An Samenthafftige Zins Zuverwenden vergünstiget unnd bewilligt haben Wie Von Wort zu Wort hernach Volget, Item Adam Steurers Witfrau. hat Jeziger Zeyt Als dieser Brief gegeben Ward zinset ab dem Vallenperg Zechen Ayer die hat Jer Vogt Thoma steurer Abgelöset Ye Ain Ay umb Ainen Haller gerechnet mit acht Schiling unnd vier pfennig Hauptguet, Item Cristan und Hanns Schnell die gebrüeder Auch Jacob Ösch und Thoma steurer haben zinset ab dem Vallenperg Ain schiling und fünff Ayer, die haben sy Abgelösst mit vier und Zwainzig schilling unnd Zwen pfennig Hauptguet, Item Cristan unnd Hanns schnell die gebrüeder haben Zinset ab Ainem Ackher genannt der Hafner zwen schiling, die haben sy Abgelösst mit zway Pfund Hauptguet. Item Gerg Zollers Erben haben Zinset Ab Frickhliss Ulrichen güeter Im Hatlerdorff fünff schiling vier pfennig, die hat Gerg Zoller Abgelösst mit fünff pfund sechs schiling und Acht pfennig. Item Martin Lueger Als Ain Erb Hannsen Steufflins, hat gezinst Ab dem Rottenbomgarten zwen schiling und sechs pfennig die hat Er Abgelöst mit zway pfund Zechen schiling Hauptguet, Item Hanns Wechinger Im Oberdorff Als Ain Erb Hannsen Steufflin hat gezinst Ab dem Rottenbomgarten Ain schiling sechs pfennig die hat er Abgelöst mit dreyssig schiling Hauptguet, Item Barthleme Diem Als Ain Erb Hannsen Steufflin hat gezinst Ab dem Rottenbomgarten für sich selbst Ain Bazen, und für Gorgen Steufflin Kinder Zechen pfennig. Das hat Er alles Abgelöst mit Zway pfund pfennig Hauptguet, Item Hanns Welpi der Mezger hat zinst Ab dem Vallenperg zwen schilling die hat Er Abgelöst mit zway pfund pfennig Hauptguet, Item die Hargartner Ab Keleckh haben gezinst Ab dem Hargarten sechs schiling die selbigen haben Abgelöst Liennhart Keckhlin Ab Keleckh unnd Gorg [Jörg] Zengerlin Jedtlicher den halbenthail thuet sechs pfund pfennig Hauptguet, Item Jacob frener hat gezinst Ab Ainem stuckh reben Im Weyssachar drey schiling, die hat Er Abgelösst mit drey pfund pfennig Hauptguet, Item Hanns schmitter hat gezinst Ab seiner Hofstat Im Niderdorff sibenzechen pfennig die hat Er Abgelöst mit Acht unnd zwainzig schiling vier pfennig Hauptguet, Item Caspar Natterer Als Ain Erb Petter meuzen Ab zwayen manmad genannt Hainrichs graben drey schiling die hat Er Abgelösst mit drey pfund pfennig Hauptguet, Item Hanns Am thobel hat gezinst Von der Hofstat Im Weppach sechs schiling, die hat Er Abgelöst mit sechs pfund pfennig Hauptguet, thuet Alles In Ainer Summa sechs unnd dreyssig pfund sibem schiling unnd sechs pfennig, Welches gelt Wir Also par Empfangen unnd zu oft gemelter Cippel Nuz An Samenthafftige Zinßbrief Angelegt haben, Darauff sollen Alle und Jede Urbar Rodels verzaichnussen unnd brief Welche obgemelter Zins halben Jez vorhanden seind, oder hinfüro über khurz oder Lanng Zeyt herfür khomen unnd funden Wurden, gantz tod craftlos und Richtig sein unnd haissen, Hierumb für unns selbst Unnsere Erben Unnd Yedermeniglich sagen unnd Zellen Wir die obbenannten Zinser Alle Jere Erben Unnd Nachkhomen Auch der genannten Jere guetter, darab der Zinß ganngen Ist unnd wer sonst Quittieren bedarf, Von Wegen der benannten sechs unnd dreyssig pfund sibem schiling unnd sechs pfennig Hauptguets Damit sy Jere Järliche Zinß haben Abgelösst sampt Allen Verfallnen Zinsen Unnd gennzlich Aller gerechtighait so Wir durch Zinßbrief Urbar oder Inwendary zu den benannten güettern unnd Jeren Zugehörden oder derselbigen Innhabern bißher gehept hond oder hinfüro haben sollen oder möchten Aller ding Quitt frey Ledig Unnd Loß, unnd fürhin In Ewige Zeyt Umb das Alles unansprechig zu sein In Allweg, Des zu Warhafftigem Vesten Urkhund, So haben wir die obbenannten Unnsere Aigne Angepornne Innsigl gehenckht An disen Brief, Der Geben Ist zu Torenpeuren An unnsere Liebe frawen Liechtmeßtag den Annderen February, Nach Christi unnsers Lieben Herren gepurt gezellt fünffzechenhundert unnd Zway unnd sechzigsten Jahre .p.

Rückseite:

Quittung Etlicher Abgelöster Zins Pöstle

No LL.

2. Feber 1562 N^o 560